

梁

園

風

雅

梁園風雅卷二十

張周田

五言律詩

早春偕高伯宗魏順甫二比部夜集李伯承符卿

霜雪朝能霽
琴尊夜可消
寒辭三殿盡
春入九關遙
北渚回鴻鴈
南宮變柳條
相將坐暝色
海月破煙霄

元夕賦得火樹銀花合

火樹排虛上
銀花入暗開
一宵春色到
萬戶夜光

來對月驚飄桂臨風擬落梅莫辭歸路晚攜得豔
陽回

寄黃太僕

閒寂惟高枕悲涼但濁醪石流西澗月山入大江
濤天地成孤旅風霜長二毛當年白雪調今日向
誰操

夏夜漫興

暝色蒼蒼至琴書燕坐幽虛窗偏駐月積雨自生
秋送酒陶潛徑裁詩謝眺樓三年淹客邸茲意未
能酬

暮春偕黎惟敬梁思伯遊韋氏山池

二首

地湧習池水天清韋曲塵紫鱗驚觸岸白鳥靜依
人陰合溪初午香回逕有春予將甘薜荔爾莫厭
荆榛

拾翠行芳艸攀花到石楠人煙還薊北亭景似江
南落照山山動微風樹樹含徘徊遲去馬碧色起
澄潭

題曹伯貞芙蓉亭

舊遊衡嶽畔楚女采蓮多落日青絲竿中流白苧
歌羅裙同葉颭丹臉逼花過明月歸橈去空江漫

綠波

送吳令之西河守

二首

浮棹中流下山川信美哉西河如昨日吳起此重
來路出封泥谷城臨避暑臺邊關紛白羽惆悵異
時才

汝水流無盡浮雲去不還河橋方極目搖落正摧
顏春雨龍蛇火秋風雀鼠山帛書應念我飛度穆
陵關

得家書

道路豺狼隔鄉園鴻鴈稀書纔傳片紙歲已換春

衣客久貧非病，天長夢是歸。無言頻徙倚，郡閣送斜暉。

風

乾坤吹欲裂，日月暗相從。樹入千江雨，霜流萬壑鍾。湘山殘舞燕，漢水矯游龍。馭此泠然去，天邊二室峰。

待黜不至酒酣漫興遂作歸山詞

芳艸將歸路，浮雲不繫身。檢囊惟藥物，解綬一樵人。歲月莊園夢，功名漢閭薪。君看麟閣上，那得畫詞臣。

長沙道中

詞賦無今古垂名半逐臣
井仍傳太傅江尚識靈
均月吐淮南桂秋生夢澤
尊長沙楓樹老愁殺洛
陽人

酌酒

一酌千愁盡悠悠土木身
樓臺三峽月鼓角九江
春山水私詞客衣冠忌酒
人長安鳴珮者半是霍
家親

題劉子真東山草堂

世路黃塵合名園紫蕨肥
孤亭邀落日五柳帶空

靡山抱風雲長秋隨雁鶩歸更臨池上酌積翠滿
人衣

下鬼門關入楓竹坪

行役何時已勞歌意有餘山田多種秫石澗不生
魚桐子珠爭綴楓林錦自疎故鄉休更問難得武
昌書

破石峽

石峽何年破嶙峋傍古城風雲開二華日月避雙
莖岷水秋偏急巫山遠漸平相看回湫處或恐滯
歸程

月夜過少衡

避俗臨幽社談經到子雲
劒開當北斗琴至度南
熏坐外有星聚尊前欲夜分
今宵燕市月爲爾倍
清芬

七夕

明河南北注牛女限西東
一水經年別三秋此夕
同橋梁凝暮靄機杼淨
高空獨有長門妾亭亭望
不窮

汪山人白雲故居

孤亭依鳳嶺五柳俯漁磯
雲是他年白人憐此日

非山川留杖履歲月送芳菲千古徵君色江天仰
少微

送人南歸兼寄其弟

令弟青雲器仍聞落羽還斯人不顯達吾道轉艱
難歲月虞翻老窮愁范叔寒州玄今就否容鬢易
摧殘

答王元美兵憲

霜風吹白月誦汝泰山歌意氣回星斗淒清憶薜
蘿功名離亂損詞賦困窮多蚤暮春花發天門擬
共過

除夜

雪華餘徑竹春色改庭柯一歲窮悲盡孤臣感慨
多鴈聲歸紫塞客夢渡黃河把酒東風至憑軒一
放歌

將之湖南寄別吳侍御約卿

二首

憶到相逢處翻增遠別情九江楓樹落一路暮猿
聲北斗臨燕塞南湖抱楚臣音書千萬里况隔漢
家營

別惡滿蘼蕪遙看碣石孤泉聲千樹徹山色亂雲
扶畏路逢人少時名與禍俱只將雙涕淚留作報

恩珠

同邦陳沆漢江

百年常恨別千里此相從野色杯湖醉斜陽白水
春天傾歆岸樹雲載渡江峰漠漠瀟湘北時吟萬
壑龍

湘陰道中逢劉少衡分韻

栖栖安所適祇以負柴荆一葉三江樹孤舟萬里
程艱危知國士貧賤損時名未有長沙召還應媿
賈生

古意寄遠

秋水留丹照寒山減翠微
妾悲紈扇棄君忍帛書
稀老去星垂鬢愁來血染衣
片雲將客意遙傍故園飛

鑽天巖眺

鳥道躋攀入蠻煙黯慘生
高秋夔子國落日杜鵑聲
樹杪繩橋直雲間火井明
昭君村在眼駐馬一含情

火峰

秋色高驚隼歸雲護蟄龍
蠻家穴半壁鳥道閣危峰
麥隴分青細楓橋結綺重
倦遊聊自晒遮莫似

臨卽

聞鴈

離離從北至肅肅始南征能使瀟湘水皆含朔溪
聲黃花籬外吐白髮坐中生是物關時序悠然萬
古情

飲陳從訓山房

仄徑緣山轉懸泉入戶飛分林排鳥道背閣起漁
磯工瑟從吾好銜杯與世違坐看明月上不醉莫
言歸

月夜飲伯俊書屋

霜月流清漢光輝動綺筵窗間開粉堞杯裏出青
天未穩林栖夢宜叅米汁禪關山曾十載爭似此
霄懸

陪乘器洪河泛舟

爲待將圓月仍留欲盡春挂舟初解纜桃水忽迷
津白雪觀濤賦玄經載酒人兼葭聊作席鷗鳥漸
相親

詠石榴花

奇樹生西域何年傍汝墳漢槎孤欲到安石遠能
分暝砌輝丹日晴枝嬾絳雲衰顏全借爾莫遣落

紛紛

乾甫宅待月

遙遲東溟月高齋坐不歸悠悠出地上稍稍覺星
稀兔抱虛輪躍烏懸破鏡飛舉杯邀共飲好爲照
漁磯

簷葡

芳園收宿雨簷葡繞前除西域移根遠南風放蕊
初妙香疑雪霰豔色失芙蓉若作空王供天花想
未如

寒夜集朱燦之

華館面城開城陰落酒杯凍雲行且止棲鳥去仍
回奇字君能問微名衆所猜過逢知不厭天地日
氛埃

祇抱離羣歎寒宵坐欲終朱絃流暗水紫劒出藏
虹櫓自成吾散途寧爲汝窮陽春回至後似有北
歸鴻

步過王園觀梅

冬盡仍餘雪尋梅信杖扶興來東閣望開到北枝
無此地春風早誰家夜月孤松林堪醉臥清夢落
蒼梧

發巴東

風激三潮澗天迷百里荒山名多借水人語各依
方晚景黃花嫩陽陂綠篠長霏微橫雨色無乃近
高唐

得勝關

二首

不覩南陽氣空瞻上將壇寶刀看水逝赤幟與霞
殘喪亂英雄起風塵混合難長驅當百戰豈謂遂
偏安

帝子元龍種將軍況虎臣鼎存終復漢鹿失未亡
秦落日關河淚中原戰伐塵荒祠臨峽口千古一

悲辛

巫山漫興

峽裏天何細沙間路轉紆雲從江面起雨到嶺頭
無鄉國遼東鶴朝廷葉縣鳧卽今違旅病不是著
潛夫

經葛陵廢縣

禾黍今如此關城安在哉竹疑龍未去人似鶴重
來雨色含荒野河流上古臺仙蹤猶寂寞何處問
蓬萊

秋日偕陳道易見甫集寵甫山亭

結社竹林邊幽棲碧草前雲生常繞戶木落漸開
天不閉求羊徑高吟鮑謝篇此中堪避世兄弟亦
忘年

社日舟中晚望

水溜圓紋起風高曲岸摧占沙鷗哺子垂野稻含
胎晚飯尊鱸具初衣薜荔裁客星如有意的的向
波來

江漲玩月

斷續雲連影霏微月送光楓丹寧借雨榆白不關
霜樓閣侵星出波濤接漢長驚鳥看漸起有意作

津梁

臥病北村

明月離東海遙登嵩少山天垂金雀鏡人老玉門
關鴈影音書外砧聲霜露間漢家頻選將蕩子不
知還

孟真招飲莫愁湖戲爲豔曲

莫愁不可見湖水日澄清舉棹鴛鴦起翩翩度石
城綠楊留舞態寶瑟想歌聲惟有巫山妾堪知暮
雨情

淮陽道中

朝雲常作雨春水易生潮囊有浮淮賦村餘渡海
橋桃花疑馬妬桂樹學人招寂寞空山裏離魂黯
自銷

與李汝齊觀濠梁泉

行樂春泉上開尊午夢餘但知吾是蝶莫問子非
魚鬚髮驚心短山川過眼虛蒙城遺宅在傲吏爾
何如

過劉孝伯

久坐殘更漏開門月似霜吳鉤織自曲秦鏡破仍
光江漢堦前沒關山雨後涼不因林鳥起猶自戀

餘觴

李易二廣文過草堂

罷官茅作宇窮巷蓆爲門二妙連鑣至餘生四壁
存蓼花紅吐日竹葉綠當尊不厭漁樵事相將過
別村

山陽道中

參差不可狀石勢似相攻已訝前山寨俄看大壑
通貫魚人入谷旋蟻馬行空蜀道雖云險分明在
峽中

邠州謁太王廟

一代貽謀遠千秋廟貌崇艱難開帝業稼穡代天
工已著居戎化兼傳避狄功至今遺俗厚彷彿見
邠風

飲盛將軍園亭

莫道邊州惡賓筵殊可誇紅鹽供濁酒白乳點新
茶月上將軍樹星懸使者槎更言胡樂好爭爲進
琵琶

海石灣水漲不得渡聞董使君已發湟中
有作

誰策重溟石嶙峋破白雲水如穀洛關人似女牛

分一柱虹堪立千溪雨乍聞投荒吾豈恨且爲惜
離羣

度黑山

未離青海畔已渡黑山巔蔓州軍營沒浮雲客騎
懸亂峰爭落日羣木戰秋天縱有中原信誰從萬
里傳

答中丞李次溪時行邊原州

絕域蕭關道中丞節制師威聲分鶴唳陣法演魚
麗王粲從軍賦呼韓保塞時隴西門下客意氣自
君知

月夜與諸子談莊子

宇宙三江北風煙二室南玉笙歸子晉白鶴化蘇
耽積素明秋水流光變夕嵐濠梁天鏡裏幻出百
花潭

汪懋叔至同賦

積雨生秋氣驕陽避雪臺以君千里至值我一尊
開徑竹分風進漁燈代月來新安山水好臨別幾
徘徊

送道士謝玄珏之楚尋師

行矣將安適秋風此送君尋師依鬼谷采藥去人

羣野飯山山石春衣處處雲何時緱嶺上笙鶴一
相聞

夜

戍鼓荒城靜商歌落葉微露臺天四抱霜砌月交
輝遲暮如冬日蕭條只釣磯壯心消不盡化蝶夢
中飛

雪中同社諸子來訪

豈發山陰興來尋處士家雲將天一色雪與鬢雙
華地僻初聞霰林幽忽著花君能竟此曲寡和未
爲誇

夏日同閤汝用曹季虎見甫乾甫震兒咸
兒滋蘭園汎舟

扁舟臨汝海小築傍山城楊柳分堤映芙蕖與岸
平鴉投斜照去魚遡上流行都遣風塵累菰蘆過
此生

香雪閣晚眺

乾坤隨杖履秋氣動蕭森浩蕩軒楹敞紫回草樹
深水煙晴覆渚天籟靜依林病起看鷗鳥知予海
上心

七夕

病裏雙星夕愁中三伏過蛾眉登片月鵲羽斷明
河無復穿針興誰當乞巧多燈前兒女笑吾醉亦
長歌

七言律詩

同元美子相登高樓

桑乾如帶抱長安萬里中原掌上看春到三關餘
積雪尊開二月動微寒徘徊玉樹凌風迴咫尺金
莖賜露難同是登臨君有作淒其非土罷憑闌

寒食有感

空齋禁火憶長安上苑煙花北極看當日故人俱

喪亂各天生事共艱難
城頭萬樹春垂暮
雨外千峰晚更寒
零落隴梅愁寄遠
徘徊殘照立江干

郡閣送見甫南歸

閣外千峰滿翠微
閣中相送淚沾衣
層城一葉迎秋下
萬里孤帆帶雨歸
人渡黃河南鴈共
身留紫塞北書稀
寒雲片片堪攜去
好向青山護蕨薇

飲劉應麟芙蓉洲

小閣荷香拂酒清
芳洲窈窕夕風輕
亭亭破浪千枝出
冉冉窺人並蒂生
旋有吳娃歌白苧
如從漢署望金莖
一杯欲上芙蓉露
無那浮雲蔽鳳城

喜元美開府鄖陽

春陵南去鹿門西，煙月春來豔大堤。
忽枉美人青玉案，遙傳樂府白銅鞮。
佩刀卜相千鱗長，簪筆生花五色齊。
那得便從登峴首，與君痛飲醉如泥。

漢江汎舟留別元美得灘字

夕照樓船鼓角寒，尊開江漢已春殘。
來從嶓冢三秦拆，瀉入潯陽九派寬。
副相虎符今下瀨，使君魚服舊爲灘。
却愁分手黃姑渚，一水相思永夜看。

送伯宗高比部爲景府右史

方城紫氣鬱嵯峨，帶礪今看帝子過。
礪指衡山爲

泰嶽帶還瀕水作黃河朝廷禮數元王異賓客文章宋玉多在昔曳裾應不賤休從華髮怨蹉跎

五日有感

欲典春衣舊酒樓汎蒲忽憶楚江頭千帆簫鼓魚龍曲一水芙蓉鸚鵡洲歲月獨醒人所厭風塵多病自堪愁孤城寂寞燕山暮回首瀟湘是壯遊

書陳道易屋壁

結構茅堂汝水東中流汎月若乘空逢人不下梁間榻避世還如河上公古木深深留宿雨遠天漠漠動秋風武陵未許漁舟到煙鎖寒塘萬竹叢

自壽春鎮發舟

禹廟山前雁影稀，乘龍洲畔鷺交飛。
落霞倒掛珊瑚樹，密藻斜牽翡翠衣。
立水鮫人還墮淚，驚沙鷗鳥未忘機。
莫將短髮愁中盡，蝦菜西風待汝歸。

寄羅虞臣

瀟湘苦竹入秋斑，芳草天涯隔楚關。
慘淡功名三黜後，蹉跎歲月二毛間。
愁腸盡斷相思水，淚眼初經大別山。
病客何曾投彩筆，不知誰遣護征蠻。

元日雪示見甫弟

朔雪霏微滿洞庭，疎煙寒霧畫冥冥。
如攀嵩少三

花樹恐滯鉤天一葉莫江海頻呼鴻作弟播遷到處客爲星孤臣此日瀟湘上悵望汀洲草色青

送王使君提兵入蜀

巫峽秋聲濫潁孤王遵叱馭競前驅洗兵雨淨三苗國吹角風高八陣圖棧道燒殘西極紫巴山開盡巨靈趨懸知劔閣題名處還與燕然片石俱

送劉夔菴之鞏昌

六月長城擁傳過九邊秋色傍人多杯行西夏葡萄酒曲進涼州水調歌乘障虜應清玉塞尋源地欲盡黃河書生自有犁庭策未許天驕爲請和

題潘中丞留餘堂

副相臺成茗水濱捲簾山色拂題新風雲不散三
江氣棟宇常含萬古春已借餘波爲雨露更分末
照動星辰漢家韋氏遺經在此地因君憶古人

寄懷河道潘中丞

兩朝開府岱山隅十二諸侯泗上趨宇宙再通滄
海賁星辰初兆泰階符流言正復居東土散地端
應泛五湖明月天西高欲墮爲君投作報恩珠

進瓜步新河贈潘使君

天風蕭颯佐揚舲兩岸春回萬柳青壘石已堪殘

北固引泉似可辨中泠三江芻粟今虛達九塞風
煙豈盡停自是憂時兼報主可知潘鬢欲星星

過壽春贈南叔後

五馬騫騰帝故鄉依稀春色賦長楊侍臣縱作東
方謫太守還如北海狂佩有龍鱗新賜劔含餘雞
舌舊分香由來池上神仙吏領郡猶堪下鳳凰
自芙蓉洲登仰止岡

孤臺千尺枕清池十里芙蓉入鏡披桐柏水寒生
月早木陵關迴度鴻遲感時謝病游梁苑失路悲
秋續楚詞若向登高論作賦一時綵筆自君知

元美邀飲道院

江漢雙懸幕府清，還因多暇訪蓬瀛。
層軒遠有涼風入，片雨遙侵落日生。
林外白雲供酌酒，道傍黃石佐談兵。
可知子晉元仙骨，欲去猶聞鶴背笙。

除夕隴西道中

隴西之水何濺濺，此夕遙聞獨泫然。
星斗漸殘孤戍外，人家忽盡大荒前。
悲風鼓角天將曙，絕塞干戈客未還。
縱使今宵猶可續，那能白髮再爲玄。

徐司馬撫浙鳩工，捷石海塘功成，作詩寄之。

河渠太史謾勞裁精衛千秋枉自哀日上扶桑開
島嶼地臨構李出蓬萊鰲簪忽送三山石蜃口遙
分萬里臺不獨揚波青海怪會看重譯越裳來

鞏西驛寄李本寧

麥秀空城馬去遲書來相慰正相思風塵忽灑羈
人淚關塞長留幼婦詞片月龍頭天在水孤筇日
暮鬢成絲明朝又作秦吳別寄爾淮南桂樹枝

贈鄭山人

秋杪孤城斂夕煙君來貰酒坐霜天丹青眼底驅
曹霸著作人間老鄭虔繞榻修篁晴共語近燈叢

菊夜爭然預愁明日扁舟去繫在柴門五柳邊

過黑松堡

山畔松林黯戍樓征人一望一回頭峰留餘雪長
侵夏穴吐驚風只似秋戎馬未消仍轉戰芻糧盡
減尚誅求前朝故壘今猶在寂寞何人拜徹侯

別南陽匡倅

匡衡抗疏大名垂何事雲霄竟一麾再借南陽爲
召父曾行澤畔似湘纍風塵舊德收能晚宇宙新
知別更悲賴有離筵尊酒在爲留殘日盡餘卮

中秋次武安值雨同乾甫夜坐

去歲祁連月似霜中原今夕剩悲涼嫦娥自老浮
雲影鳥鵲虛疑永夜光閨闔關山飛玉篴蕭蕭木
葉下清漳空齋淅瀝懸秋雨濁酒青燈夢故鄉

午日同伯峻及弟乾甫登使院山亭時伯
峻將歸

嫩槐乳燕逗涼颼佳節登臨晚不遲星宿暫同荀
氏里風煙兼似習家池陵嶒病骨三年艾潦倒篇
章五色絲蒲葉青青堪繫馬驪駒歌罷欲安之

陳晦伯庄

楊柳振蒲積遠汀川原斜抱草玄亭居然汝穎多

奇士況是陳家聚德星雨後花爭千樹發晚來天
合四山青問奇載酒無虛日可得江潭問獨醒

同熊憲副登秭歸樓分賦

二首

樓上西風鬢有華憑欄落木滿三巴山川熊繹開
周甸歲月張騫老漢槎白日嵐光千雉伏遠天江
色一龍斜孤臣索漠無人住惆悵關門起暮笳
城頭月出照高唐城下江波白練光驚鵲頻翻巫
峽樹征鴻羣起洞庭霜庾公自愛乘秋色王粲深
悲滯異鄉爲惜天風吹玉笛招呼黃鶴共翱翔

登太和

二首

天柱峻嶒帝下都高標回日礙江湖人間五嶽堪
今古海上三山竟有無試劒石分雙電曳展旗峰
迴七星扶匡廬祇在藤蘿外已見香爐湧座隅
薜荔春深覆鶻冠千峰雨色向人殘露分金掌秦
關細雲接蒼梧楚塞寬滾滾懸流天並墜陰陰灌
木畫生寒憑高彷彿長安近徒倚星辰直北看

于臯張武庫讌武威東湖

城邊千樹夾飛湍湖上孤亭鎖暮巒抱石雷霆晴
自激侵堦霜雪夏生寒即妨鷗鳥猜津吏却傍秋
風採澤蘭把酒忽驚西極遠回看月出是長安

偕本寧于肅邸觀冰燈

重壁臺前夜可憐
况逢楚客雪爲篇
光分玉樹寒相照
色借青藜晚並懸
星斗高銜雲母轉
芙蕖深映燭龍然
知君錯擬金莖露
却憶承恩侍從年

盛汝光齋居道觀值雨

齋沐聊從白鶴羣
仙臺清磬隔花聞
秋山隱几過朝雨
古殿焚香駐暮雲
漫侶赤松思辟穀
且師黃石試從軍
清時暫爾無烽火
習靜桃源獨有君

逍遙園訪穆敬甫

逍遙園裏傲煙霞
真作蒙城吏隱家
豈少歌鐘過

北里自緣天籟領南華爲魚撥撥遊春藻化蝶
遽坐晚花暫息扶搖無不可肯將清淚怨長沙

題林泉晚適卷送叅知范公歸豫章

江鄉無處不堪憐山下楓林山上泉泉吐驪珠邀
夜月林橫翠幄駐朝煙歸帆好趁桃花水招隱初
栽桂樹篇爲向卿家論故事高風長在五湖邊

送李侍御按滇

把酒登臺豁大荒昆明萬里坐相望人從東井占
星使客自中秋度夜郎遂有霜凝驄馬節旋令瘴
淨碧雞鄉可知紫殿虛供奉柱下誰如李伯陽

題潘中丞讀書臺

昆山千仞洞庭傍更結精廬在上方
樹杪女牛雙宿近階前茗雪二流長
春風芳草抽書帶夜月梅花伴筵牀
曾是中丞吟詠處石林一部奏清商

楊太宰桃花嶺

一枝遙向禁林分畫漏春池曳履聞
自出秦源登上宰幾回漢綬侍明君
玉盤王母千年實瓊樹瀛洲五色雲
碣石宮前滄海畔天風萬里接清芬

送劉大將軍自朔方移鎮甘肅

頻年欵塞借前籌移鎮君恩覺更優
馬上饒歌吹

漢月軍中舞曲按涼州三城初罷防河戍五郡重
迎定遠侯爲賦陽關杯酒句霜風瀚海正西流
余旣列調籍出關而曹中丞以薦自張掖
以七言近體來唁遂荅之

解組東征萬里餘翻從羅雀見幽居故人遙送陽
關信逐客空傳上蔡書去國那能明薏苡歸家猶
喜及尊鱸天涯興盡方回棹不是文園負子虛

立春日寄贈何啓圖宗伯

憶爾容臺侍至尊茲辰綵勝正承恩衣冠八座登
南省綸綍三朝寄北門雪後梅開何遜閣春來瓜

種邵平園扁舟泛泛桃花水穩坐淮流一晤言

送邵叅知子元入賀

謝傳東山起未遲歸朝三接荷天慈殿前皎月懸
金鑑空外流霞漾玉卮使者逾工聽馬步上林全
借鳳凰枝相逢無地還成別他日雲霄祇夢思

綠萼梅

聞說仙人萼綠華嫣然來自太清家先春葱蒨渾
疑葉餘雪依稀尚著花夢裏玉顏何皎皎風前翠
袖故斜斜憑軒遙上羅浮月縹蒂相看醉紫霞

送文學秦京使靖藩報訃

單車萬里問征途半在山峰半在湖粵嶠風雲開
赤社湘川涕淚滿蒼梧中原地盡蠻煙合大海波
翻東郡孤爾自遊梁誇照乘不知何似日南珠

哭司寇王元美

二首

麋子城邊漢水清西征曾醉亞夫營陽關一就乾
坤別峴首長懸宇宙名忍把和歌裁楚步難從與
國問齊盟何知深語南樓夜已是千秋永訣情
四部遺編盡體裁微言百萬走風雷劒埋紫氣衝
星上龍化明珠湧月來不必名山藏副本豈應吾
世失仙才招魂莫有巫陽至今日江南重可哀

送錦源任使君拜同卿兼觀察之秦

露重秋高萬木酣
離筵楊柳尚毵毵
功名河內仍關內
風化周南復召南
雁塞定應須上策
馬曹兼不廢清談
酬恩俄灑鮫人淚
戀別那停使者驂

題鄭戶部思成招隱園

卜築名園碣石東
去天尺五五雲通
池流薊北桑乾水
堦擁淮南桂樹叢
谷口風煙邀結駟
小山日月遲冥鴻
金門大隱稱仙吏
漫向虛無憶八公

賦得秋夢

羅衣窈窕怯飛霜
少婦深閨夜未央
萬里長風吹

旅雁三邊明月照沙場
逡巡似識金微險
展轉那禁玉漏長
相見定然悲遠別
不知枕上是遼陽

梁園風雅卷二十

梁園風雅卷二十一

張周田

五言排律

武安遇吳約卿侍御夜酌分韻得公字

鼓角蜚狐北乾坤鉅鹿東
尺書三歲隔斗酒一宵同
芳草悲王粲青山憶謝公
揮戈堪駐日彈鋏競飛虹
地東千崖立河盤九塞雄
怪來涼意動白簡解生風

寒食

勝地君山酒佳辰禁火天
春生三峽道風裊一湖

煙岸柳波相射園桃日對然分嵐開疊嶂承瀑起
重泉走馬章臺畔呼鷹夢澤邊人依芳草醉舞藉
落花憐流水聽爲曲朝雲望是仙遠鐘江際寺返
照雨中船介子恩元薄長沙席未前歲時還蹴鞠
習俗且鞮韞埋沒蒼龍劒淒涼白雪絃泥塗十日
累貧病半生捐伏枕頻胡蝶沾襟只杜鵑于今霄
漢上誰復問張騫

飲伯庸奉常山亭

地引東山屐春生北海尊萼湖浮畫棟瓜地隔青
門雙燕衝簾語羣峰入戶蹲草芳王粲宅花報武

陵源曉霧文玄豹寒煙嘯白猿池龍堪化杖階鶴
可乘軒人帶餐霞色巾餘漉酒痕賦驕十二峽書
著五千言避世初倚柱忘憂或藉萱風塵難出處
流落信乾坤染竹成湘淚衣蘭似楚魂會當因病
免歸臥茂陵園

除夕阻風嘉魚

壽命非金石能禁歲月徂獨身千里外一夕兩年
俱鬢益他鄉白顏消昨日朱烈風吹峽轉逗雪入
江無梅與冬齊破鴻將夜並孤霜乾雲夢澤冰合
洞庭湖春色遲楊柳寒光上鹿盧已甘蠻府老但

作步兵呼宦計卑詞客時名避酒徒明朝春水起
張翰會歸吳

丁卯元日夜行魚山道中值雪

驛路魚山北人煙象港東君恩還使者客鬢又春
風雨雪江華淨關河夜色同玉毫移月兔練影變
雲驄懷璧藍田裏探珠合浦中崢嶸千樹曉浩蕩
萬家空興似王猷盡途憐阮籍窮白交梅送蕊青
坼桂留叢授簡虛梁苑裁紈棄漢宮不知元日至
貧病正書空

送見海翁中丞拜少司空入朝

新命提兵馬專征大海隅風雲隨指顧宇宙失艱
虞一劒千金報諸侯四鎮趨戈矛通碣石組練下
江湖方叔能軍久蕭何轉餉須蓮花鋒裏出楊葉
箭邊無開府功名大朝廷恩澤殊精靈從嶽降羽
翼薄天孤八座當玄武三台應赤符銜魚原有兆
身是及門徒

紅門山

朱鳥臨南極丹魚出夏泉豈如茲境絕直上與天
連白晝常留電中峰迴聚煙近溪疑日浴著樹似
花然錦繡文何麗金銀氣獨鮮未爲勾漏令已涉

祝融顛霜葉堪相妬寒梅轉自妍片虹雄劍外不
夜古城前道路紅顏歇雲霄紫禁縣瓊琚無可報
空賦四愁篇

晦日同見甫弟泛舟省中小池

徑草繁春色江風逗碧流興疑剡溪發人似武陵
遊雨歇千花滿雲開一鏡浮沙虛天在水岸轉樹
乘樓池鎖君山翠亭巢夢澤鷗坐看正月破落日
倍生愁

閏十一月晦日集大呂社

閏月倏然盡陰陽不肯停仲冬回塞雁晦日落階

莫風爆千崖翠天分四座青歲時驚過電朋好叶
占星杜預春秋癖稽康土木形誰能揮短景暫爲
駐顏齡

七言排律

奉酬子順春日見憶之作

雙鯉俄傳漢水濱遙緘尺素問沉淪風煙涕淚瀟
湘達歲月艱危放逐頻衰鳳那能終戀楚敝貂羸
得且辭秦歸來多難無青鬢老去相思滿白蘋羨
爾雄飛關社稷貽予高唱動陽春草芳鸚鵡題詩
處秋滿蒹葭載酒辰取醉幾曾妨落帽罷官猶自

爲霑巾一麾已是池中物三黜真同柳下人獨歎
飄零星作客深悲遇合與如神江湖寂寞音書斷
悵望雲天雁影新

春酬顏使君春日見憶之作

抗疏明時鬢欲斑渚宮旌節杳難攀桃源解逐神
仙吏楓浦疑臨法從班白日傳經開絳帳清秋飛
檄定烏蠻春申門下三千士暮雨江邊十二山獨
送征鴻歸楚塞正思遷客度函關中原河嶽孤帆
外南國樓船夕照間愁借澧蘭緘別恨淚移湘竹
上離顏長沙賈傅徵何晚彭澤陶潛去不還紫氣

雙衝星錯落朱絃一奏水潺湲子虛已動君王問
屈指天涯見賜環

南明精舍爲淮海中丞尊人賦

風塵解綬一憑欄海上浮雲萬里看台嶽賦留霞
並爛蘇門嘯罷月俱寒當年佐郡推孫楚未老逃
名似謝安白雪自知能和寡青山誰道欲歸難垂
楊繚繞陶潛宅短髮虛無貢禹冠巢木暫應齊鶴
馭枕流聊復與龍蟠秋高八桂吟梁甫日落三苗
起釣竿經術向來稱漢闥玄成今見再登壇

五言絕句

送柳公子兄弟歸廬江

二首

二月著貂裘雪壓關河道舉頭憶梅花低頭見白
草

細雨維舟處他鄉送客時愁將花片片恨入柳絲
絲

暮冬雷電風雨驟至因以識異

巫峽沉沉動冬雷亦震威遙看雲霧裏似有螭龍
飛

雨不絕

泥塗吾不厭河漢汝應愁自罷張騫使無人問斗

牛

捷軍山

西望玉門開心從落日還煙塵一萬里初度捷軍
山

古鄯得本寧河州書約會積石回題十字
云欲語多時別先愁計日回悵然賦此

蝴蝶爲莊周杜鵑是望帝豈無羽翼生自顧生無
計

七言絕句

寄元美

學日月牙卷三
憶君落日獨登臺雲斷天空海色開縱有雙魚論
故舊黃河不過薊門來

荅元美

二首

使者朱衣佩紫魚翻從幕府得閒居池留明月頻
酣酒門閉蒼苔好著書

昨夜煙霞夢岱宗與君明月坐秦松共攀秋色窺
滄海剗却東南七十峰

喜吳明卿至

楚天秋色削芙蓉明月時登五老峰一自投珠江
水裏至今不敢臥驪龍

送陳于舜使君之越同高伯宗魏順甫雜
賦越中古跡

湖上千峰黛色流湖中明月藕花秋女郎十五春
相向採得芙蓉誇並頭

過城南別業

樹色蟬聲雨更幽誰吹玉笛倚南樓不知天末涼
風起怪底梧桐葉葉秋

初春訪吳士明明府不遇

山雪初晴鴉亂啼春風遙度五陵西長吟落盡峰
頭日獨挂雲帆下剡溪

送胡殿讀子文自廣平別駕之南岡丞
霜落河橋斷柳枝疎疎寒雨度山遲他鄉放逐相逢處多難飄零獨去時

得吳侍御上谷書

蕭瑟書封易水雲開緘字字照斜曛當時擊筑長安者數到窮交獨有君

九日登滏陽城樓

雄堞高臨滏水前霜空楊柳淨寒煙綠堤無限黃金色恰似江南二月天

送邵仲學州守之隴西

蟠塚山前漢水流
乘槎還擬到牽牛
支機倘爲張騫
贈分得明河一片秋

宛丘道中柬林使君

平臺高宴日
銜杯應教俱稱上
客才若把子虛誇
漢主梁園那得馬卿來

戲贈張京兆

千絲楊柳鎖秦臺
春盡飛花覆綠苔
向晚西樓纖月挂
爭傳張敞畫眉來

於巫山得乾甫弟漢陽書却寄

一夜猿聲足白頭
可堪峽裏度三秋
無端灑淚臨

江
水
任
是
魚
龍
也
解
愁

堯灘阻風宿江上禪舍

碧殿朱甍勢欲翔
半臨山翠半滄浪
龍宮自覺風濤異
一夜江聲抱石牀

留別陳思俞兼荅送赴涼州之作

胡天不斷朔風來
白草蕭蕭畫角哀
一曲涼州歌未罷
黃雲飛上赫連臺

紫霄峰

禹蹟橋邊詠紫芝
半空斜照雨如絲
春陰不散香爐氣
勺水雙開日月池

五老峰

羣山江上列爲屏
窈窕煙蘿出磬聲
最是慇懃惟五老
歸時相送到時迎

桃源峰

一丘一壑坐銷憂
洞裏秦人半白頭
四月桃花緣澗吐
始知秦向此中留

黃羊灣

峰如蹲虎水游龍
千仞飛湍落暮鐘
十月清霜霑萬壑
中天秀色削芙蓉

渡河曲

星宿遙分九曲河西來秋色入秦多尋源不是尋
常使河伯先澄萬里波

涼州曲 二首

流沙西接暮天平大閱今開細柳營星海月支俱
屬國何方不起受降城
霧下葡萄萬顆明笛中梅柳一時驚朝來馬上饒
歌曲翻出涼州水調聲

嘲劉考功不飲

楚舞翩翩間楚歌春城明月共婆娑今宵不醉新
豐酒明日風塵可奈何

登廬山絕頂

呂公祠畔雨初晴霞綺繽紛似赤城遙見山頭鸞
鶴度天風吹落玉簫聲

寄吳約卿侍御

汴水黃河左右盤隋堤楊柳畫中看吟回少室三
花色書破淇園萬竹寒

送王憲副入覲

竟陵春樹鬱蒼蒼漢水千秋作帝鄉一自大風留
幸沛至今雲色盡飛揚

巫山送胡正甫歸泰和

巴水巫山學字生客星中夜照江城只今看取維
舟處已是嚴灘一樣清

叔後見過出小巵行酒因以爲壽

聞道君家華嶽東曾過酒肆挾雙龍秋來一酌笑
蓉露醉殺天邊玉女峰

病中謝德臣惠橘

湖南秋盡橘初黃采采猶含楚澤香羨爾能將三
百顆病中相贈洞庭霜

藍田道中

山山雲氣上摩天散作瑤華萬樹懸但覺夜光能

照乘不知身已到藍田

金城關寄見甫乾甫

絕塞千峰過雨新
題書寄汝淚沾巾
黃河直入中原去
愁殺關門萬里人

謝本寧餉羅

纖羅一束捲春煙
分得瀟湘半幅天
裁就單衫歌樂府
江南白紵是新篇

巴州驛

子規啼罷塞雲愁
川口風煙似暮秋
一夜雨聲千澗水
不知何處是巴州

張掖午日

佳辰尊酒薦菖蒲絕域孤臣醉自扶十萬天驕新
欵塞不須身佩辟兵符

春暮自甘州回署見杏花有作

晚霞遙逗杏花生微綠風前柳色輕獨把一杯身
萬里不知今已過清明

首夏偶成

春老邊州未見花黃羊川北盡黃沙長城落日多
風雨可得征人不憶家

送李直夫同卿自張掖入賀

仙掌雲間秋色開
扶桑初日照蓬萊
曾經太華峰前過
爲上芙蓉露一杯

顧使君招飲露臺

天擁孤城列宿重
古臺秋樹度疎鐘
尊前月落林鳥起
一道明河墮碧峰

寄本寧

鴻雁西飛落景殘
尺書相憶在樓蘭
霜空一片關山月
分送孤臣兩地寒

肖甫少保破虜凱歌

漁陽突騎若雲屯
大鉞高懸殺氣昏
十萬胡兒齊

解甲一時面縛向轅門

余有別業去洪河數十武與汝海相望也
種柳夾岸築樓其上敬美匾曰綠波并系
以詩海內同志屬和者多秉器自貴竹復
貽絕句作此奉酬

五柳柴門日日秋西風吹浪拂層樓千絲婀娜飄
難定似識當年折贈愁

月夜聞笛

十載臯蘭三出師角巾歸第鬢如絲那知今夜關
山月却向中原笛裏吹

送鄭憲使開府上黨

亭障如林日荷戈太行西去見黃河谷經雀鼠旌
旗滿城繞光狼雨雪多

舟中夜別子順

驪駒一曲斷晴雲況在孤城可忍聞萬里瀟湘迷
去雁江天處處泣離羣

哭子彬叅議如蜀因扶持還閩中

秋色初高彩婺星斑衣中夜點流螢黃姑渚畔銀
爲漢玉女峰前幔作亭

劉選部臥病東山詩以訊之

東山杳靄白雲間
謝傅登臨且未還
聞道山中多桂樹
不知秋色共誰攀

荅元美

白雲一片落蒼梧
化作三江復五湖
愁倚長風歌九辨
不堪秋色滿姑蘇

輓王中丞

二首

撫劒橫行遼海邊
斗間紫氣日相纏
只今惟有延陵客
來挂吳門萬樹煙

漁陽西去動妖氛
遼海東來有斷雲
落日轅門秋色裏
何人不哭李將軍

哭敬美

埋玉吳天若箇峰中原雪涕夕陽春不辭絮酒爲
君酹泉路人間隔幾重

送鄧二守之鄱陽

春郊雨過綠楊齊客路流鶯萬樹啼行到南陽瞻
峴首故園只在數峰西

題畫

萬嶺桃花照暮春秦時風物晉時人雲深不記歸
來路惟許漁舟一問津

茱萸灣

春林風色一何驕出岸洪波到暮潮
尊酒江村帆落後月明猶聽廣陵簫

覽社湖

空濛長鎖海門煙潮起維揚欲蹴天
醉裏不知舟近遠淮山無數落尊前

題何季子令升鳴玉館

華館風清萬玉鳴倏然秋色起孤城
一從身到崑山上始信雲間小陸名

梁園風雅卷二十一